

खबरां

- प्रधानमंत्री नरेंद्र मोदी होर कल नमीं दिल्ली दे यशोभूमि च सेमीकान इंडिया-2026 दे 5में संस्करण दा उद्घाटन करडन।
- वित्त मंत्री निर्मला सीतारमण होरें राष्ट्रहित गी सर्वोपरि रखदे होई परिपक्व कर नीति पर बैहस दा आह्वान कीता।
- सरकार नै ई.पी.एफ.ओ दी वेतन सीमा 15 जहार रपे शा बदाइयै 25 जहार रपे प्रति माह करी दित्ता ऐ।
- भारत नै अंतरराष्ट्री जल क्षेत्र च नौसैनिक टकराव गी जन्म देने आहली पाकिस्तानी नौसैनिक इकाइयें दे अस्वीकार्य आचरण पर पाकिस्तान कन्नै कड़ा विरोध दर्ज कराया ऐ।
- गृह मंत्रालय नै शहजाद नेटवर्क गी यू.ए.पी.ए तैहत आतंकवादी संगठन घोशित कीता।
- नीति आयोग आसेआ घोशित भारत इलेक्ट्रानिक मोबिलिटी इंडेस्क 2025 दे मताबक इलेक्ट्रानिक मोबिलिटी गी अपनाने च दिल्ली शीर्ष प्रदर्शनकर्ता दे रूपै च उभरेआ ऐ।
- अज्ज हरियाणा, चंडीगढ़, पंजाब ते पूर्वोत्तर दे किश हिस्सें च भारी बरखा दी मेद ऐ।

<><><><><><>

PM-Semicon

प्रधानमंत्री नरेंद्र मोदी होर कल नमीं दिल्ली दे यशोभूमिक च सेमीकान इंडिया दे पंजमें संस्करण दा शुभारम्भ करंगन। त्रै दिनें दा एहू सम्मेलन इक प्रमुख मंच दे रूपै च कम्म करग। एहू सहयोग गी बढ़ावा, नवाचार गी गति, विनिर्माण क्षमताएं गी मजबूती, निवेश आकर्षित करने ते प्रतिभाएं गी विकसित करने लेई वैश्विक सेमीकंडक्टर ते इलेक्ट्रानिक्स इकोसिस्टम गी इक्के मंच प्रदान करग।

<><><><><><>

FM-Tax

केंद्री वित्त मंत्री निर्मला सीतारमण नै आखेआ जे कर कन्नै जुड़े दे प्रस्तावें च देशहित गी सबनें शा उप्पर रखेआ जाना लोड़चदा ऐ। उनें आखेआ जे कर दरें च कमी, छूट जां रियायत दी मंग कोला पैहले राष्ट्रहित पर ध्यान दित्ता जाना लोड़चदा।

<><><><><><>

PM Vishavkarma 3 Years

प्रधानमंत्री विश्वकर्मा योजना दे कल त्रै बरे पूरे होई जाडन। इस योजना तैहत 30 लकख लाभार्थीएं दे पंजीकरण कीते जाने दा लक्ष्य पूरा होई चुके दा ऐ। इस योजना दी शुरूआत प्रधानमंत्री नरेंद्र मोदी होरें 2023 च कीती ही। चिन्हित बवसायें च लगगे दे रिवायती कारीगरें ते शिल्पकारें गी संपूर्ण सहायता आधुनिक उपकरण, कौशल ते बजार तगर पुज्ज ते संपर्क प्रदान करिए उंदे रिवायती कौशल

गी मजबूत करना ऐ। भलेआं लौहके-लौहके ते दरमयाने दर्जे दे उद्योगें सरबन्धी मंत्रालय कल कोलकाता च योजना दी त्री बरेगंड मनाग।

<><><><><><>

Swachhata-Hi Seva

स्वच्छता ही सेवा 2026 अभियान कल थमां देश भर च शुरू होगा। एहू अभियान 17 अक्तूबर धोड़ी चलग। अभियान दे तैहत स्वच्छता लेई चिन्हित स्थलें ते मती आवाजाही आहले सार्वजनिक थाहरें गी स्वच्छ बनाने, युवाएं दी भागीदारी बदाने ते सर्कुलर इकानमी ते वेस्ट टू वेल्थ पैहल दे जरिए स्वच्छता से समृद्धि गी बढ़ावा देने पर विशेष जोर दित्ता जाहग।

<><><><><><>

COAS-Russia Visit

थल सेना प्रमुख जनरल धीरज सेठ अज्ज थमां त्रै दिनें दी रूस जात्तरा पर न। जात्तरा दामकसद भारत ते रूस बश्कार लम्में समें थमां चला'रदे रक्ष सरबन्धें ते सैन्य सहयोग गी होर मजबूत करना ऐ। जनरलसेठ, रूस दे थल सेना दे कमांडर इन चीफ कर्नल जनरल आंद्रेई मोर्दविचेव कन्नै पेशेवर सैन्य सहयोग ते प्रशिक्षण सने आपसी हित दे मुद्दें पर चर्चा करंगन। ओहू मास्को च राश्ट्री रक्षा नियंत्रण केंद्र दा दौरा करंगन ते रूसी रक्षा मंत्रालय दे वरिष्ठ अधिकारिएं कन्नै मुलाकात करंगन।

<><><><><><>

EPFO

केंद्री मंत्रिमंडल नै कर्मचारी भविष्य निधि संगठन-ई.पी.एफ.ओ आस्तै वेतन सीमा गी 15 ज्हार रपे थमां बढ़ाइये 25 ज्हार रपे फही म्हीना करी दित्ता ऐ। मंत्रिमंडल दी बैठक मगरा अज्ज मीडिया गी संबोधित करदे होई सूचना ते प्रसारण मंत्री अश्विनी वैशणव होरें आखेआ जे फैसले कन्नै 51 लख थमां मते बादू कर्मचारी लाजमी ई.पी.एफ.ओ कवरेज दे दायरे च आई जाडन। एह्दे कन्नै श्रमिकें आस्तै सामाजिक सुरक्षा दा दायरा बड़ा मता बढ़ी जाहग। सरकार दा सलाना खर्च करीब 11 ज्हार 339 करोड़ रपे होने दी मेद ऐ।

<><><><><><>

India Pak Naval Unit

विदेश मंत्रालय नै अज्ज नमीं दिल्ली च पाकिस्तान उच्चायोग दे प्रभारी राजनयिक गी तलब करिए समुंद्र च पाकिस्तान नौसैनिक इकाइयें दे नामंजूर आचरण पर सख्त बरोध दर्ज कराया। मंत्रालय नै आखेआ जे एह्दे कन्नै भारती नौसेना दी इक पाकिस्तानी इकाई कन्नै टक्कर होई। मंत्रालय नै आखेआ ऐ जे अप्रैल 1991 च भारत ते पाकिस्तान बश्कार सैन्य अभ्यास, युद्धाभ्यास ते सैन्य टुकड़िएं दी आओजाई दी अग्रिम सूचना सरबन्धी समझौते दी स्टी खलाफवर्जी ऐ। मंत्रालय नै इस्लामाबाद स्थित भारती प्रभारी राजनयिक गी बी पाकिस्तानी विदेश मंत्रालय दे सामने बरोध दर्ज कराने दा निर्देश दित्ता ऐ।

<><><><><><>

Ozone Day

विश्व ओजोन दिवस दे मौके पर अज्ज पर्यावरण, जंगलात ते जलवायु बदलाव सरबन्धी राज्य मंत्री कीर्तिवर्धन सिंह होरें आखेआ जे ओजोन परत हानिकारक पराबैंगनी किरणें थमां साहड़ी रक्षा करदी ऐ। सोशल मीडिया दी इक पोस्ट च सिंह होरें आखेआ जेद ओजोन परत दा संरक्षण धरै थमां शुरू होंदा ऐ। उनें आखेआ जे ए.सी दा तापमान 24 डिग्री सेल्सियस पर रखना ते उर्जा दक्ष उपकरणें दा इस्तेमाल करने जनेई लौहकी-लौहकी गैस कन्वै उत्सर्जन घट्ट करने च मदद थ्हांदी ऐ। सिंह होरें लोकें थमां सुरक्षित भविष्य आस्तै टिकाऊ जीवनशैली अपनाने दा आह्वान कीता।

<><><><><><>

Chauhan Bihar

केंद्री कृषि ते करसान कल्याण ते ग्रामीण विकास मंत्री शिवराज सिंह चौहान हुंदे नेतृत्व च इक केंद्री दल अज्ज बिहार दे हाड़ प्रभावित क्षेत्रें दा जायजा लैने लेई दौरा करा'रदा ऐ। मुख्मन्त्री सम्राट चौधरी ते राज्य सरकार दे वरिष्ठ अधिकारी बी दल दे कन्वै ना। दल नै पटना जिले दे मनेर ते दानापुर दे हाड़ प्रभावित क्षेत्रें दा दौरा कीता ते स्थिति दा जायजा लैने लेई वैशाली जिले दे राघोपुर दियारा दे हाड़ प्रभावित क्षेत्रें दा दौराकीता।

<><><><><><>

EAM-Bhutan

विदेश मंत्री डा. एस. जयशंकर अज्ज थमां भूटान दी दो दिनें दी अधिकारिक जात्तरा पर जाडन। इस दरान डा. जयशंकर भूटान दे विदेश मंत्री लयोन-पो डी.एन डुंग्येल दे कन्वै दपक्खी वार्ता करंगन। ओहू भूटान नरेश कन्वै मुलाकात करंगन ते भूटान दे प्रधानमंत्री कन्वै बी भेंट करंगन।

<><><><><><>

Rohingya-Settlements

जम्मू दे नरवाल इलाके च बांगलादेश ते म्यांमार थमां गैर कनूनी तौर पर आए दे रोहिंग्या परौआरें खलाफ कार्रवाई शुरू कीती गेई ऐ। साहडे जिला संवाददाता नै जानकारी दिती ऐ जे अधिकारिएं गैर कनूनी तौर पर रवा'रदे लोकें गी थाहू खाली करने आस्तै आखेआ ऐ ते इयां नेई करने आहलें खलाफ सख्त कार्रवाई कीते जाने दी चेतावनी दिती ऐ। हिदायतें मगरा केई सारे परौआरें अपना समान बनना शुरू करी दिता ऐ।

<><><><><><>

Newzealand

न्यूजीलैंड दी संसद ने भारत दे कन्वै मुक्त बपार समझौते गी लागू करने दा कनून पास करी दिता ऐ। एह्दे'नै दौनें मुखें दे बश्कार शुल्क च भारी कटौती ते बपार विस्तार दी बत्त पदरी होई गेई ऐ। इस बिल गी विपक्षी लेबर पार्टी दे समर्थन कन्वै पास कीता गेआ। बिल दे पक्ख च 93 ते बरोध च 29 वोट पे। न्यूजीलैंड दे बपार मंत्री टॉड मैक्ले होरें आखेआ ऐ जे इस समझौते कन्वै निर्यात करने आहलें गी फौरी ते बड्डा लाहू हासल होग। उ'नें मेद बुझ्जी जे एहू उच्च स्तरी बपार समझौता इस बारे दे अखीरै तगर लागू होई जाहग। इस समझौते दे तैहत, भारत लेई न्यूजीलैंड दे तकरीबन 95 फीसद निर्यात पर

शुल्क गी जां ते खत्म करी दित्ता जाह्ग जां बड़ा घट्ट करी दित्ता जाह्ग। इस समझौते दे दायरे च औने आहले अद्धे शा मते उत्पाद, समझौता लागू होने दे पैहले गै दिनै थमां शुल्क मुक्त होई जाडन। एह्दे कन्नै गै, सब्बै भारती उत्पाद न्यूजीलैंड दे बजारें च शुल्क मुक्त मिलडन। न्यूजीलैंड ने अगले 15एं बरें च भारत च 20 अरब अमरीकी डॉलरें दी रास-पूंजी लाने पर बी सैह्मति जताई ऐ। दौनें मुल्लें मूल रूप कन्नै इस बपार समझौते पर अप्रैल म्हीने दस्तख्त कीते हे। जून 2026 तगर दे माली बरें च भारत ते न्यूजीलैंड बश्कार दपक्खी बपार कुल 2.29 अरब अमरीकी डॉलरें दा रेहू दा ऐ।

<><><><><><>

MHA-UAPA

केंद्री गृह मंत्रालय नै पाकिस्तान समर्पित शहजाद भट्टी नेटवर्क गी गैर कनूनी गतिविधिएं दी रोकथाम सरबन्धी कनून यू.ए.पी.ए तैहत इक आतंकी संगठन घोशित करी दित्ता ऐ। अज्ज 16 सितंबर गी जारी इक अधिसूचना मूजब इस नेटवर्क गी यू.ए.पी.ए दी पैहली अनुसूचि च 46में प्रतिबंधित आतंकवादी संगठन दे रूपै चशामल कीता गेआ ऐ। मंत्रालय आसेआ जारी गैजेटिड अधिसूचना मूजब इस संगठन गी पाकिस्तान दी खुफिया एजेंसी आई.एस.आई दा समर्थन हासल ऐ ते एहू गुट भारत दे खलाफ बन्ने पारा थेहारें, विस्फोटकें ते नशीले पदार्थें दी तस्करी च सक्रिय रूप च शामिल रेहा ऐ। एह्दे अलावा एहू संगठन सोशल मीडिया ते होरनें डिजिटल मंचें राहें नौजवानें ते अपराधिणें गी लालच देइयै आतंकवाद दे रस्ते पर पाने ते देश बरोधी गतिविधिएं लेई चुक्क देने दा बी कम्म करा'रदा ऐ। शहजाद भट्टी नेटवर्क भारत च नफरत फैलाने ते सदभाव भाईचारे गी नुकसान पुजाने दा कम्म बी करा करदा ऐ ते इसी आतंकी संगठन घोशित करने दा फैसला सरकारै, आतंकवाद गी दना बर्दाश्त नेई करने दी अपनी नीति तैहत लैता ऐ।

<><><><><><>

NITI Aayog Index

इंडिया इलेक्ट्रानिक मोबिलिटी इंडेक्स2025 दे मताबक इलेक्ट्रानिक मोबिलिटी अपनाने च दिली गी राज्यं ते केंद्र शासित प्रदेशें च शीर्ष थाहर थ्होई ऐ। इस सूचकांक दा शुभारम्भ अज्ज नमीं दिल्ली च नीतिआयोग आसेआ कीता गेआ जिस च उप राष्ट्री स्तर पर ई-मोबिलिटी लेई नीतिगत ढांचे ते कार्यान्वयन परिणामें दी रूप-रेखा प्रस्तुत कीती गई। दिल्ली दे बाद होरनें शीर्ष प्रदर्शन करने आहले राज्य ते केंद्र शासित प्रदेश महाराष्ट्र, कर्नाटक, चंडीगढ़ ते गोवा न।

<><><><><><>

Weather

भारती मौसम विभाग नै अज्ज अंडमान ते निकोबार द्वीप समूह, अरुणाचल प्रदेश, असम, मेघालय, हरियाणा, चंडीगढ़ ते पंजाब च च भारी बरखा दी मेद बुझ्झी ऐ। केरल, माहे,पंजाब, उपहिमालयी, पच्छिम बंगाल, सिक्किम, तमिलनाडू, पुदुचेरी ते कराईकल च बी अज्ज इस्सै चाल्ली दे मौसम दी शेंका ऐ।

<><><><><><>

साउदी अरब नै आखेआ जे वायु रक्षा प्रणाली नै कल संझा मक्का दे कौल इक्क हौथी ड्रोन गी रोकियै नष्ट करी दित्ता। यमन सरकार दे समर्थन आहले गठबंधन सेनाएं दे प्रवक्ता मेजर जनरल तुर्की अल मलिकी नै इस हमले गी मक्का गी निशाना बनाने गी हौथियें दी दुई कोशिश दस्सेआ। उनें बरे 2017 च होए दे बैलिस्टिक मिसाइल हमले दा बी जिक्र कीता। मेजर जनरल अल मलिकी होरें आखेआ जे ऐसे कुसै बी हमले दे खलाफ गठबंधन जरूरी गैं पुट्ग।

<><><><><><>